

## Hiyay Hulat nan Pablo kanan FILEMON

<sup>1</sup> Hiko yay Pablo a nakapidiho uli ha pangiadal ko nin tungkol kanan Apo Cristo Jesus. Kalamo ko yay Timoteo a katongno tawo kanan Apo Jesus. Ampangumohta kayi kammo, Filemon, a an-adoen mi boy kalamo min māghilbi nan Apo Diah. <sup>2</sup> Angkumohtaen miya met ye Apia a katongno tawo kanan Apo Jesus boy kanan Arquipo a kapadiho min homain limon ampangiadal nin tungkol kanan Apo Jesu Cristo boy wanabay met kanlan māmteḡ a ampaytipon ha baey mo.

<sup>3</sup> Matanggap yo dayi ye kangedan boy katanaan a ibat kanan Bapa tawon Diah boy Apo Jesu Cristo.

### *Hiyay Pangado boy Pamteḡ nan Filemon*

<sup>4</sup> Filemon, tepe an-ipakigwang kata kanan Apo kon Diah, an-ipahalamatan kata kana, <sup>5</sup> uli ha nabalitaan ko a pamteḡ mo kanan Apo Jesus boy pangado mo ha kaganaan a pagtao nin Diah. <sup>6</sup> An-ipakigwang ko kanan Apo Diah a ihulong moy manged a nakem mo ha kaganaan a māmteḡ ta-omen umway ye pagkataloh mo ha kaganaan a kangedan a in-ibyay nan Apo Diah kantawo uli ha pamakimamagha tawo kanan Apo Jesu Cristo. <sup>7</sup> An-adoen kon katongno, peteg a angkaaliket ako boy kinumhaw ye nakem ko uli ha pangado mo kanlan pagtao nin Diah, ta pinakhaw moy nakem la.

*Hiyay Awok nan Pablo kanan Filemon tungkol kanan Onesimo*

<sup>8</sup> Haanin, bilang apohtol nan Cristo, main akon katulidan a mangibilin kammo nin hukat mon diyagen. <sup>9</sup> Noba ulita an-adoen kata, ket ahe kataynan bilinan, no aliwan makiingalo koynan bengat kammo. Kaya-bay bilang maghan matu-toa kammo boy naipidiho uli ha pangiadal ko nin tungkol kanan Apo Jesu Cristo, <sup>10</sup> ampakiiingalo ko kammo uli kanan Onesimo. Imbilang ko yan anak ko ha pamteg, ta ha anti ko ihti ha pidihowan, ket namteg ya kanan Apo Jesu Cristo. <sup>11</sup> Hatew, homain kan pakinabang kana, ta tinumakah ya. Noba haanin, luwa kitayna a makinabang kana.\*

<sup>12</sup> Ampaudongen koya kammo ye an-adoen kon Onesimo. <sup>13</sup> Labay koya po dayin kumonin ihti ta-omen ha panaglap na kangko, ba-mon hikaynay ampanaglap kangko legan anti ko ihti ha pidihowan uli ha pangiadal kon Manged a Balita. <sup>14</sup> Noba ahe ko yan labay diyagen a homain kan pamaluboh ta-omen kan ahe angkapilit bengat, no aliwan luboh ha nakem mo ye panaglap mo kangko.

<sup>15</sup> Ta maka naihyay ya kammo nin makandin panaon ye Onesimo ta-omen ha pag-udong na, ket mapagkalamo mo yayna makanoman. <sup>16</sup> Hatew, hiyay Onesimo, ipoh mo yan bengat. Noba haanin, aliwa mo yaynan bengat ipoh, no aliwan katongno mo yayna met kanan Apo Jesus. An-adoen koya. Noba lalalo dayi ye pangado mo

---

\* **1:11** *Onesimo: hiyay labay habiyen nin ngalan Onesimo ket "mapakinabangan."*

kana, ta ipoh mo yayna, ket katongno moya po kanan Apo.

<sup>17</sup> Kaya-bay no an-ibilang mo kon kapadiho mon māghilbi nan Apo Jesus, ket tanggapen moya awod ye Onesimo a ba-mon hikoy antanggapen mo. <sup>18</sup> Ket no nagkahalanan ya man kammo o nakautang, hikoytay hingilen mo. <sup>19</sup> *Hiko baynan mihmon Pablo ye nanulat nin yati. Ket hikoyta met ye mamayad nin hinyaman a nautang na kammo.* Filemon, ahe ko anhabiyen kammo a utang moya kangkoy pagkatanda mo kanan Apo Jesus. <sup>20</sup> Kaya-bay katongno ko, uli kanan Apo, diyagen mo dayi ye awok ko kammo tungkol kanan Onesimo. Paaliketen moko dayi bilang katongno mo kanan Apo Jesu Cristo.

<sup>21</sup> Nanulat ako kammo, ta angkahigudo kon diyagen moy awok ko kammo boy tanda ko a igit po ye diyagen mo. <sup>22</sup> Main ako po manaytin labay kammo. No malyadi, italadanan mo kon kunaan ihen. Ta anhigudowen ko a makaudong ako ihen kanyo ulita an-ipakigwang yoko.

### *Kalampuhan a Pangumohta*

<sup>23</sup> Kumohta ka met kano wanan Epafra a kalamo kon nakapidiho ihti uli ha pangiadal na nin tungkol kanan Apo Cristo Jesus. <sup>24</sup> Hiyay Marcos, hiyay Aristarco, hiyay Demas, boy hiyay Lucas a kalalamoan kon māngiadal, ket angkumohtaen laka met.

<sup>25</sup> Mikakaanti ya dayi kanyo ye kangedan nan Apo Jesu Cristo.

## **Ayta Abellen**

### **Ayta, Abellen: Ayta Abellen (New Testament+)**

copyright © 2020 Wycliffe Bible Translators, Inc.

Language: Ayta, Abellen

Contributor: Wycliffe Bible Translators, Inc.

Wycliffe Bible Translators, Inc.

All rights reserved.

2020-11-11

---

PDF generated using Haiola and XeLaTeX on 21 Feb 2024 from source files dated 29 Jan 2022

05a1bfd1-4534-5761-ade7-123a56da354c